

«Turissem e gastronomia profiteschan dalla festa»

Gion Nutegn Stgier/FMR

Tiradours e tiradouras tot cuntaintas, stupenta lavour digls organisatours locals e participants e participantas tg'on tutgia precis. Chegl la bilantscha d'anfignen ossa dalla Festa federala da teir 2026 aint igl Grischun.

Siva digls 5 da zarcladour 2026 ògl nom a Coira ed an 19 stands externs «Fieu liber». La 59avla Festa federala da teir è gio eida en bung toc anavant. La pi gronda occurrenza da sport da chest onn an Svizra cozza anc anfignen igls 5 da fanadour 2026. Secretari general e la persunga instancabla da chella occurrenza da teir naziunala è Carl Frischknecht. El è fatschento mintga de a Coira aint igl center da festa u sen viseta ainten egn digls 19 stands exteriours, noua tgi vign er sagetto. La FMR ò scuntro igl om da Tumeigl ed anteriour president dall'Associaziun grischuna da teir a Coira e fatg cun el ena bilantscha intermedia-ra dalla Festa federala da teir actuala.

Fitg blers resungs positivs

A l'antschatta digl discurs dei Frischknecht: «La festa marscha betg angal bagn, mabagn fitg bagn.» Igl secretari general accentuescha tg'igl fetscha grond plascheir da survagneir mintga de nundumbrevels resungs positivs da tiradours e tiradouras e da numerosas societads da teir. Chels plaschevels resungs cumprovan tge lavour excellenta tgi vigna prestada a Coira agl center principal dall'occurrenza da teir naziunala, ma surtot er aint igls ulteriours 19 stands da teir. A Coira vign sagetto l'antiera emda oter tgi la mesemda, aint igls ulteriours stands da teir da venderde anfignen dumengia, scu per exaimpel er a Crappa Naira ed a Rona. Carl Frischknecht sottastretga: «Blers da chels resungs positivs survign igl comite d'organisaziun per la fitg bunga lavour digls organisatours locals, er d'en stand da teir pi pitschen.»

I vignan cumpros ulteriours stetgs

Scu tg'igl secretari general dalla Festa federala da teir dei, seia l'occurrenza an tottas modas e manieras en grond success anfignen ossa. An media vegia en tiradour u ena tiradoura sagetto seis stetgs sen la distanza da 300 meters. Carl Frischknecht menziunescha, tgi igl domber da schozs per participant e participanta seia tar 70 tocs. El dei: «Nous vagn gia da pustar siva muniziun.» La ra-



En om ferm occupo: Carl Frischknecht, igl secretari general dalla Festa federala da teir 2026.



L'occurrenza da teir naziunala aint igl Grischun – a Coira ed or ainten las regions – è en success cumplagn.



Fotos Gion Nutegn Stgier

schung è tgi blers tiradours e tiradouras compran ulteriours stetgs u teiran varsaquants colps supplementars, schinumnos «Nachdoppel» per migliurar igl resultat contanschias avant. Anfignen alla fegn dall'occurrenza da teir naziunala vigna igl domber da muniziun ad esser tar 2,7 milliuns patronas, manegia Carl Frischknecht.

Aint igl avigneir angal ple electronic e decentral

Bler lod drezza Frischknecht agls 5000 gidanters e gidantras tgi on contribuia fitg blier agl reuscheir dalla 59avla Festa federala da teir. Plascheir ò el surtot tgi gl'è sto pussebel da cattar tants «voluntaris», er nundumbrevlas persungas, las qualas èn betg schi collieidas cugl sport da teir. Per Frischknecht è chegl en mussamaint tg'igl sport da teir ò anc adegna ena gronda muntada ainten la populaziun.

Positiva è la festa tenor el er ord vista turistica. Igl secretari general dei: «Turissem e gastronomia profiteschan prest igl pi fitg dalla festa.» Er per la registraziun digitala digls resultats per l'amprema gEDA ins vegia anfignen ossa strousch gia problems, uscheia Frischknecht. Aint igl avigneir ins vigna a realisar occurrenzas da teir pi grondas, scu cantunalas, ma er naziunalas, angal ple da maniera electronica ed an sasez decentral. I seia sa cumprovo fitg d'organisar l'occurrenza da teir an chella furma. Scu tgi Carl Frischknecht menziunescha, tgi è sez en tiradour d'elita, seia la Festa federala da teir er chegl tgi pertotga ils resultats da sagettar digls tiradours e dallas tiradouras ena grondiosa tgossa. I vignan contanschias ferm resultats. Plascheir ò igl om da Tumeigl er digl taimpel digls regals cun premis an ena valeta totala da 450 000 francs.